


La lenghe furlane in di di vuê: vive, vivarose e difondude, ancje tra i zovins

Le fevele passe metât dai abitants dal Friûl Vignesie Julie

Daûr di une ricercje resinte promovude de ARLeF e realizade de Universitât dal Friûl

Tes provinciis di Gurize, Pordenon e Udin, 600.000 personis a fevelin par furlan. Di chestis, 420.000 in maniere regolâr, 180.000 in maniere ocasionâl. Si trate di plui dal 60% de popolazion des trê provinciis. Se si cjapin dentri tal cont ancje i abitants de provincie di Triest, i fevelants par furlan a son cuasi la metât de popolazion complessive dal FVJ. A son i dâts plui interessants de ricercje su la difusion de lenghe furlane, volude de ARLeF e realizade de Universitât dal Friûl cul coordinament dal prof. Claudio Melchior tal 2014, presentade al public cualchi setemane indaûr.

Di fat i zovins (fasse di etât 18-29 agns) a declarin di fevelâ par furlan in maniere regolâr, plui di chei jenfri i trente e i cuarante agns, invertint une tindince che e someave destinade a dâ simpri e dome dâts negatîfs (di pierdite progressive de lenghe) a man a man che si svinavisi al presint. I dâts relatîfs ae classe di etât plui zovine a rivuardin un numar di cês no alt in sens assolût, ni in cheste ricercje ni te realtât anagrafiche (chei jenfri i 18 e i 29 agns a son une percentuâl une vore basse de popolazion). Però, tal stes timp, il fenomen relatîf a cheste inversion di tindince te fase plui zovine, che “e vuadagne” un ûs dal furlan invezit che “pierdilu”, al è un dât salt, par vie che al è za vignût fûr in altris ricercjis resintis e coerent ancje cu la osservazion de societât, dal teritori, dai events culturâi che si davuelzin, de affluence ai stes. La comprension de lenghe furlane, ancje tra cui che no le fevele, e rivuarde cuasi la totalitât des personis: in provincie di Pordenon e Gurize, plui dal 83% de popolazion al capis il furlan. Le percentuâl e passe il 96% in provincie di Udin. Tal complès, plui dal 90% dai abitants des trê provinciis al declare almancul di capî la lenghe furlane. La percentuâl di cui che al declare che “doi gjenitôrs ducj i doi furlans a varessin di fevelâ par furlan ai fis” e je plebissitarie, cun percentuâls che in dutis e trê lis provinciis a son dongje dal 90%. Un dât cressût di passe 15 ponts percentuâi dal '98 (an de ultime ricercje di riferiment prime di cheste) a vuê. Cirche l'80% de popolazion des trê provinciis al è favorevul ae presince des leçs di tutele de lenghe furlane: ancje tancj di chei che no le fevelin a calcolin positive la presince di leçs e politichis di tutele ative. La presince de lenghe tes scuelis e je considerade positive di percentuâls



maioritariis di popolazion, che a stan dentri tra il 70,6% de provincie di Udin e il 66,9% de provincie di Gurize.

In struc, tal 2015, il furlan al ven viodût tant che une lenghe “no conotade”, une lenghe

“normâl” o “dal teritori”, conetude cu la sô storie e il so presint, cence “apologjiis” o “epicitâts” particolârs tal ûs, ma ancje cence oposizions claris e radicâls che a menacin il so status linguistic e culturâl.

La lenghe furlane protagoniste de iniziative “Gli Italiani dell'altrove”

Si è davuelte a Rome ai 19 di Mai stât, ali dal Museu nazionâl Arts e Tradizions Popolârs, une zornade di aprofondiment dedicate ae Lenghe Furlane. La iniziative e faseve part dal proget “Gli italiani dell'altrove” dedicât aes Lenghis Minoritariis, creat di Present e organizât dal Mibact - Ministeri dai Bens e des Ativitâts Culturâls e dal Turisim.

In grazie de colaborazion cu la ARLeF, Ente Friuli nel Mondo e Fogolâr Furlan di Rome, l'event al à proponût al public numerôs une riflessione interessante su la realtât storiche e contemporane de Lenghe Furlane e su lis espressions dal so patrimoni culturâl e leterari. Cun di plui a son stadis presentadis lis iniziativa plui resintis di promozion e valorizazion de lenghe.

Adun cu la ARLeF, rapresentade dal President Lorenzo Fabbro e dal diretôr William Cisolino, a àn puartade la lôr testimoniance cetancj relatôrs. Jenfri di chescj il vicepresidente dal Ente Friuli nel Mondo, Piero Villotta, il President dal Fogolâr Furlan di Rome, Francesco Pittoni e il President dal Fogolâr Furlan di Tokyo, Flavio Parisi in colegament vie Skype.

